

SAMÞYKKT

um takmörkun hundahalds í Hrunamannahreppi.

1. gr.

Hundahald í Hrunamannahreppi sætir þeim takmörkunum sem fram koma í samþykkt þessari.

2. gr.

Hundahald er háð eftirfarandi skilyrðum:

- a. Einstaklingur sem sækir um leyfi til að halda hund skal hafa náð 18 ára aldri, vera sjálfráða og eiga lögheimili í sveitarfélaginu.
- b. Skylt er að skrá alla hunda í Hrunamannahreppi. Eigandi hunds skal láta örmerkja hund sinn hjá dýralækni, skrá hann á skrifstofu sveitarfélagsins og fá þar afhenta númeraða plötu sem alltaf skal vera um háls hundsins. Fyrir þetta skal hann greiða leyfisgjald samkvæmt gjaldskrá sem sveitarstjórn setur í samræmi við 25. gr. laga nr. 7/1998 um hollustuhætti og mengunarvarnir.
- c. Skylt er hundaeiganda að hafa hund sinn ábyrgðartryggðan hjá viðurkenndu tryggingafélagi. Fyrir 1. maí ár hvert skal leggja fram staðfestingu á skrifstofu Hrunamannahrepps að tryggingin sé að fullu í gildi.
- d. Fyrir 1. maí ár hvert skal leggja fram staðfestingu á því að hundar hafi verið hreinsaðir en ef það bregst getur sveitarstjórn látið hreinsa hundinn á kostnað eigandans.
- e. Hundurinn skal aldrei ganga laus á almannafæri, heldur vera í fylgd með einhverjum sem hefur fullt vald yfir honum. Undantekning frá þessu gildir þó innan eigin lóðar og/eða lögbýlis, einnig varðandi smalahunda, minkahunda, dýrhunda og sporhunda þegar þeir eru að störfum í gæslu eigenda eða umráðamanna. Eigi er leyfilegt að fara með hundinn í skólahús, opinberar byggingar, matvöruverslanir eða aðra staði þar sem matvæli eru höfð um hönd. Á almannafæri (skipulagt þéttbýli og frístundabyggð) er leyfishafa skylt að fjarlægja saur eftir hund eða hunda sína á tryggilegan hátt.
- f. Hundaeiganda ber að öðru leyti að fara að lögum og reglum er hundahald varðar s.s. reglum um árlega hreinsun hunda og reglugerð nr. 1077/2004 um aðbúnað og umhirðu gæludýra og dýrahald í atvinnuskyni.
- g. Hundaeigandi ber ábyrgð á því að hundur hans raski ekki ró íbúa hreppsins og sé hvorki þeim né þeim sem um sveitarfélagið fara til óþæginda, með tilliti til hávaða, óþrifnaðar, eyðileggingar verðmæta eða slyshættu.
- h. Hundar á lögbýlum mega ganga frjálssir á landareign eigenda sinna. Að öðru leyti skulu slíkir hundar háðir ákvæðum þessarar samþykktar.

3. gr.

Við brot á skilyrðum skv. 2. gr. skal fjarlægja viðkomandi hund. Eigandi hundsins fær þá, ef um minni háttar brot er að ræða tækifæri til að leysa út hundinn gegn greiðslu þess kostnaðar, sem á hann er fallinn, sbr. gjaldskrá sveitarfélagsins. Sé um að ræða alvarleg eða ítrekuð brot er viðkomandi hundur tekinn út af skrá og er ekki lengur heimild fyrir eiganda hans að halda hund í sveitarfélaginu. Sé hunds ekki vitjað innan sjö daga frá því að eiganda var tilkynnt um handsömun hans má aflífa hundinn, enda sé eiganda gert ljóst hvað vanræksla á að vitja ekki um hundinn getur haft í för með sér. Yfirvöldum sveitarfélagsins er aldrei skylt að geyma skráðan hund lengur en tíu daga frá handsömun og er heimilt að láta aflífa hundinn að þeim tíma liðnum. Allur kostnaður við hundinn greiðist af eiganda.

Hættulega og óleyfilega hunda og þá hunda sem ganga lausir á almannafæri skal handsama og færa í geymslu í áhaldahúsi Hrunamannahrepps. Heimilt er að láta lóga hættulegum hundum þegar í stað, sbr. þó 8. gr. reglugerðar nr. 1077/2004. Það á hvort tveggja við um hunda sem haldnir eru í þéttbýli og dreifbýli í hreppnum.

Handsömun á hundi skal auglýst á heimasíðu Hrunamannahrepps og á fjölförnum stað t.d. í versluninni á Flúðum. Sé hunds ekki vitjað innan sjö sólarhringa má láta aflífa hann. Komi síðar í ljós hver átti hundinn þá má krefja hann um greiðslu kostnaðar.

Sveitarstjórn er hvenær sem er heimilt að afturkalla skráningu á einstökum hundum eða öllum hundum telji hún þess þörf.

4. gr.

Samþykkt þessi gildir einnig fyrir eigendur sumarhúsa og frístundabyggðar í sveitarfélaginu þó að hundarnir séu skráðir í því sveitarfélagi sem er lögheimili viðkomandi. Slíkir hundar eru þó undanþegnir ákvæðum b., c. og d. liðar 2. gr.

5. gr.

Sveitarfélaginu er heimilt að innheimta gjald vegna kostnaðar sem hlýst af samþykkt þessari. Gjaldið skal ákveðið í gjaldskrá sem sveitarstjórn setur, skv. ákvæðum 25. gr. laga nr. 7/1998 um hollustuhætti og mengunarvarnir, að fenginni umsögn heilbrigðisnefndar. Gjöld mega ekki vera hærri en sem nemur rökstuddum kostnaði við veitta þjónustu eða framkvæmd eftirlits. Gjaldið skal í fyrsta sinn greitt við skráningu hundsins og síðan árlega fyrir 1. maí. Í gjaldskrá skal einnig kveðið á um handsömunar- og geymslugjald sbr. 3. gr. Sveitarstjórn skal láta birta gjaldskrá í B-deild Stjórnartíðinda.

6. gr.

Um valdsvið og þvingunarúrræði vísast til VI. kafla laga nr. 7/1998 um hollustuhætti og mengunarvarnir.

Með brot á samþykkt þessari skal fara samkvæmt ákvæðum laga nr. 7/1998 um hollustuhætti og mengunarvarnir.

Um málskot fer samkvæmt lögum nr. 7/1998 um hollustuhætti og mengunarvarnir.

7. gr.

Samþykkt þessi staðfestist hér með skv. 25. gr. laga nr. 7/1998 um hollustuhætti og mengunarvarnir til þess að öðlast gildi við birtingu. Frá sama tíma fellur úr gildi samþykkt nr. 126/2003 um hundahald í Hrunamannahreppi.

Umhverfis- og auðlindaráðuneytinu, 15. mars 2013.

F. h. r.

Sigurbjörg Sæmundsdóttir.

_____ *Kjartan Ingvarsson.*